

Beat and move a Mustér

La sonda e dumengia vargada han ils Movis schau buglir la halla da Cons a Mustér. Ils giuvenils han demonstra lur agilitad el tact dil «bum-bum-beat».

Paul Duff/FMR

Las 60 participontas dils Movis, buobas, mattas ed enzaconts buobs, han clamau amitgs e parents per mussar tgei ch'els han empriu el miez onn vargau. Il publicum ei vegnius en roschas. La halla Cons a Mustér ei s'emplenida duas gadas la fin dalla jamna ed era l'emprova generala ei vegnida visitada stediamein. Gia ils maletgs dil film introductiv han fatg queidas. Las otg formaziuns ein sepresentadas cun nums MiniMidis, Maxis, Dance Kids, TeenAngels, DanceSkyDelirios, MovisPro, Jazzfusion e MovisGYM. Gia ils nums han tradiu tgi ch'ei tgei. Ils segls, tgaubrochels, spagats ni sault ein stai animonts e grazius. La coreografia dirigida dallas mussadras pretenda exactadad dalla sincronisaziun e concentraziun. Mintga scena rauenta enzatgei. Acziuns e figuras dattan cuntegn e levan emoziuns. Il publicum ha sblatschau e ha saltau culs acturs. Movis munta moviment ed infectescha l'entira sala.

Sublimas intenziuns

Esther Hendry, la menadra dils Movis, mira anavos sin in temps turbulent. «Corona ha schau anavos enqual fastitg», di ella. Movis miran denton anavon el futur plein optimissem. Las gidontras entuorn Esther Hendry han fatg buna lavur. «Movis munta disciplina, risguard ed atenziun dils participonts», mo las menadras promovon aunc autras bunas qualitäts als giuvenils. Moviment nutrescha tgierp e spért. Ils affons han in passatemp inspiront. Els selegan da crear enzatgei bi en gruppa. Per lur svilup ei Movis la megliera medischina.

